



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAAN TAHUNAN PERDAGANGAN LUAR NEGERI MALAYSIA 2024

**Prestasi perdagangan Malaysia 2024 kekal kukuh melebihi RM2 trilion
selama empat tahun berturut-turut**

PUTRAJAYA, 29 JULAI 2025 – Prestasi perdagangan Malaysia pada tahun 2024 menunjukkan momentum yang memberangsangkan, mencerminkan daya tahan negara serta hubungan perdagangan yang kukuh. Berlandaskan momentum ini, jumlah dagangan meningkat 9.2 peratus atau RM242.3 bilion merekodkan nilai tertinggi kepada RM2.9 trilion, tahun ke tahun (y-o-y) seiring dengan peningkatan dalam eksport (5.8%) dan import (13.1%) sebagai mana dilaporkan dalam laporan **PERANGKAAAN PERDAGANGAN LUAR NEGERI, MALAYSIA BAGI TAHUN RUJUKAN 2024** pada hari ini. Laporan ini memaparkan statistik perdagangan Malaysia dengan rakan dagangan bagi volum dan nilai barangan mengikut klasifikasi komoditi terperinci.

Ketua Perangkawan Malaysia, Dato' Sri Dr. Mohd Uzir Mahidin menjelaskan bahawa Malaysia mengekalkan lebihan dagangan untuk 27 tahun berturut-turut sejak 1998, berjumlah RM139.1 bilion, disokong oleh prestasi kukuh dalam produk eksport utama. Eksport meningkat 5.8 peratus daripada RM1.4 trilion pada tahun sebelumnya kepada RM1.5 trilion. Peningkatan eksport ini disokong oleh eksport domestik yang meningkat 9.4 peratus daripada RM1.1 trilion kepada RM1.2 trilion

dan menyumbang 80.6 peratus kepada jumlah keseluruhan eksport. Sebaliknya, eksport semula dengan nilai RM293.2 bilion merosot 7.0 peratus atau RM21.9 bilion berbanding tahun 2023. Sejajar dengan prestasi eksport, import turut melonjak 13.1 peratus atau RM159.2 bilion kepada RM1.4 trilion, tahun ke tahun. Sementara itu, lebih dagangan menyusut 35.4 peratus atau RM76.1 bilion daripada RM215.2 bilion pada tahun 2023.

Berikutan pertumbuhan yang lebih meluas, 165 daripada 261 kumpulan komoditi eksport mencatat peningkatan berbanding tahun sebelumnya, diterajui oleh barangan E&E serta lemak & minyak sayuran (minyak sawit). Bagi import pula, 191 daripada 261 kumpulan komoditi mencatatkan peningkatan, terutamanya disebabkan oleh peningkatan import bagi barangan E&E, jentera & kelengkapan lain serta koko.

Ketua Perangkawan Malaysia turut menekankan bahawa peningkatan dalam eksport adalah selaras dengan peningkatan eksport ke Amerika Syarikat yang mencatat pertumbuhan positif 23.3 peratus atau RM37.6 bilion kepada RM199.9 bilion. Peningkatan ini didorong oleh eksport yang lebih tinggi bagi barangan elektrik dan elektronik (+RM18.8 bilion); keluaran perkilangan lain (+RM7.1 bilion); jentera, kelengkapan & peralatan (+RM2.2 bilion); serta produk getah (+RM1.9 bilion). Negara seterusnya yang mencatat peningkatan eksport ialah Taiwan (+RM23.6 bilion, +54.5%); Singapura (+RM11.6 bilion, +5.3%); India (+RM6.6 bilion, +14.5%); dan Indonesia (+RM3.5 bilion, +6.9%). Sementara itu, peningkatan ketara dalam import didorong oleh peningkatan import dari China dengan kenaikan 14.9 peratus atau RM38.4 bilion daripada RM258.1 bilion pada tahun sebelumnya kepada RM296.5 bilion. Peningkatan ini disumbangkan oleh import kukuh bagi barangan elektrik & elektronik (+RM18.9 bilion); jentera, kelengkapan & peralatan (+RM9.1 bilion); serta kelengkapan pengangkutan (+RM3.0 bilion). Negara-negara lain yang turut mencatat peningkatan import

termasuk Amerika Syarikat (+RM37.4 bilion, +42.1%); Taiwan (+RM25.3 bilion, +30.2%); Singapura (+RM21.7 bilion, +15.1%); Kesatuan Eropah (+RM9.2 bilion, +9.8%); dan Mexico (+RM6.1 bilion, +198.6%).

Mengulas lanjut mengenai eksport mengikut sektor, barangan perkilangan, keluaran pertanian, hasil galian dan lain-lain mencatatkan jumlah RM1,509.3 bilion dengan pertumbuhan 5.8 peratus atau RM83.1 bilion. Peningkatan ini didorong oleh barangan elektrik & elektronik (+RM26.1 bilion, +4.5%); barangan keluaran lain (+RM15.4 bilion, +34.2%); jentera, kelengkapan & peralatan (+RM11.8 bilion, +20.5%); minyak sawit & keluaran pertanian berasaskan minyak sawit (+RM8.5 bilion, +11.9%) serta barangan perkilangan logam (+RM5.2 bilion, +9.2%). Selain itu, pengembangan import turut direkodkan bagi barangan elektrik & elektronik (+RM99.9 bilion, +28.1%); jentera, kelengkapan & peralatan (+RM24.4 bilion, +27.4%); keluaran pertanian yang lain (+RM11.6 bilion, +25.9%); barangan perkilangan logam (+RM6.2 bilion, +9.6%); makanan diproses (+RM3.5 bilion, +12.1%); dan gas asli cecair (+RM3.0 bilion, +43.0%).

Pada masa yang sama, peningkatan dalam import mengikut Penggunaan Akhir dipengaruhi dengan permintaan yang lebih tinggi terhadap barangan modal, barangan penggunaan dan barangan perantaraan. Import barangan modal yang berjumlah RM166.1 bilion (12.1% daripada jumlah import) naik 29.0 peratus, disebabkan oleh kenaikan import barangan modal (kecuali alat kelengkapan pengangkutan) (+RM37.4 bilion). Import barangan penggunaan (8.6% daripada jumlah import) mencatatkan kenaikan 12.8 peratus atau RM13.3 bilion kepada RM117.4 bilion, hasil daripada peningkatan import makanan & minuman, diproses, khusus untuk penggunaan isirumah (+RM4.5 bilion) dan barangan tahan lama (+RM3.1 bilion). Barangan perantaraan yang bernilai RM749.2 bilion (54.7% daripada jumlah import) meningkat 20.7 peratus daripada

RM620.6 bilion pada tahun 2023, didorong oleh kenaikan import alat ganti dan aksesori barangan modal (kecuali alat kelengkapan pengangkutan) (+RM87.0 bilion) serta bekalan perindustrian, diproses (+RM19.1 bilion).

Prestasi perdagangan Malaysia pada tahun 2024 adalah seiring dengan negara-negara serantau seperti Amerika Syarikat, China, Jepun, Korea, Taiwan, Thailand, Viet Nam, Singapura dan Indonesia yang turut mencatatkan pertumbuhan perdagangan positif.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan'. Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Carta 1: Export, Import dan Jumlah Perdagangan, 1990-2024



Dikeluarkan oleh:

PEJABAT KETUA PERANGKAWAN MALAYSIA

JABATAN PERANGKAAN MALAYSIA

29 JULAI 2025